

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Sorkar laipuiin chhiah Goods & Services Tax (GST) lak dan tharah, lirthei ke hnih nei leh a dang man a tlahniam dawn.
- 2. Prime Minister Narendra Modi-a'n Mizoram a rawn tlawh tur atan Aizawl chei hnum hna ngawrh taka thawh mek a ni.
- 3. Prime Minister Narendra Modia chuan India-US inkungkaihnaah President Donald Trump-an a tha zawnga thil a thlir chu a lawm thu a sawi.
- 4. Union Information and Broadcasting Minister Ashwini Vaishnaw chuan middle class chhungkaw tan Prime Minister Narendra Modia chuan GST siamthat hmangin hilpek hlu tak a pe a ti.

<><><>

GST

Sorkar laipuiin chhiah Goods & Services Tax (GST) lak dan tur thar a tih chhuah ah, lirthei tam tak chu man tlawm zawkin a lei theih dawn a ni.

Akashvani zawhna chhangin LBS Suzuki Genaral Manager Ricky Varte chuan, GST Reform 2.0 hman a nih hunah chuan, lirthei ke hnih nei leh ke pali nei thenkhatah chuan tun hma lama chhiah lak thin zaa 28 chu zaa 18 thlenga tih hniam a ni thei dawn a ti a, hei hian lirthei man a tih hniam dawn avangin lirthei leitu mipui tan a tha dawn hle a ni a ti.

(Byte: Ricky Varte)

LBS Suzuki chuan lirthei zuartu lam tan hlawkna tur niin lang rih lo mah se, mipui tan a that avangin GST lak dan thar hman tur chu lawmawm an tih thu an sawi bawk a ni.

Hetihlai hian Aizawla ei tur zuar dawr thenkhat chuan GST thar hman tur chu a tha dawn nge tha dawn lo an la sawi thiam lo tih an sawi a ni.

<><><>

PWD MINISTER

PWD Minister Pu Vanlalhlana’n tukin khan Aizawl Vaivakawn Cultural Centre-ah Vaivakawn Traffic tawt tihziaawm nana PWD ruahmanna sawi hona hun a hmanpui.

PWD Minister chuan lirthei pung zel avangin Vaivakawn Traffic junction-ah Traffic jam avangin lirthei khalhtuten hun tam tak an khawhral phah thin a ti a. Traffic jam avanga he kawng pawimawh tak zawhtute harsatna sutkian a nih theih nan khawtlang hruaitute rawn chung a ruahmanna siam thuai a tul thu sawiin khawtlang leh ram tih hmasawna tura Aizawl West Joint YMA hruaitute inhawna chu lawmawm a tih thu a sawi.

He huna tarlan danin, Vaivakawn Traffic Junction helna tur ruahmanna kalpui theih a nih chuan, Vaivakawn Field sir zawhin, Vaivakawn Bazar Building leh Vaivakawn Bus Stand chhak, Dawrpui Vengthar panna kawng inkarah lei metre 75-a thui dawh kai tur a ni a. Lei dawh tur hian Vaivakawn Field huam chhungah ban awm lo tur leh lei chu Field hmangtute tan hnawk pha lo tura siam a tul thu tarlan a ni bawk.

<><><>

PM

Prime Minister Narendra Modi-a'n Mizoram a rawn tlawh turah inbuatsaihna chu ngawrh chhoh mek a ni a, Aizawl khawpui kawngpui leh a chhehvel chu vawiin khan tihfai chhunzawm a, hmun thenkhat lai rawng hnawih a ni bawk.

Aizawl Municipal Corporation (AMC) hmalakna in Chanmari, Bawngkawn leh Chaltlang kawngpui dung te chu tihfai a ni a, hmun thenkhat lai chu rawng hnawih thar a ni bawk - AMC bakah hian Urban Development and Poverty Alleviation Department (UD&PA) bakah PWD te pawhin hma an la bawk a ni.

AMC thuneitute hnen atanga Akashvani thu dawn danin, Prime Minister Narendra Modi hian Thuampui Helipad atanga Lammual a pan dan tur sawi chian theih a la ni lo a, kawngpui a zawh theih tur Bawngkawn atanga Chaltang panna leh Bawngkawn atanga Ramhlun lam kalna te chu uluk taka tihfai bakah kawng chhe lai thawm that a ni a, kawngsir hmun thenkhat chu rawng hnawih thar a ni bawk.

(Voice Cast)

(Ruahman dan chuan Prime Minister Narendra Modi hian Bairabi atanga Sairang thleng rel kawng luhna tur chu September ni 13, Inrinni hian Lammual atangin a rawn hawng dawn a, hemi atan hian Mizoram chu kawng hrang hrangin a lo inbuatsaih a, Pu Modi-a'n a paltang theih tur kawngpui huam china awm Local Council 14 te chu anmahni huam chhung tifiin an hnatlang bawk a. ACM atanga thu kan dawn danin, Prime Minister lo kal tur atan hian faina lamah chuan inbuatsaihna pawh tha taka peih fel hman beisei a ni.)

<><><>

CHAMPHAI

Nimin chawhnu leh nizan lama ruah sur nasa avangin Champhai Vengsangah leimin,Leivung tawlh leh Lungrem chim avangin hmun thumah chhiatna a thleng a,

Heng chhiatna thlenna hmunte hi Champhai DC Office atangin disaster management lama mawhphurhna changtuten kal chilhin thil awmdan an enfiah bakah a tul angin sawrkar atanga tanpuina awm thei te an ruahman nghal.

Nizan khan Champhai Vengsang Village Disaster Management Committee kaihhruaina in In chhe ta te buangrua leh mutbu te seng hawi nghal a ni a. Vawiin ah khawtlang huapin hnatlang an nei zui bawk.

Nimin chawhnu lama ruah sur nasa avangin Vengsanga UPC biak in lungrem chim chuan a thlanga chenna In hmun thenkhat tichhia a, hemi bula chhungkaw pakhat chenna In chu luah zui tlak lohvin a chhe vek bawk a, DM&R atangin tanpuina pek nghal an ni.

Nizana dar 9:00 vela Champhai Vengsang Assam Rifles tlang atanga leivung leh chirh luang thla in chenna in pakhat a hnawl chhe bawk a, DM & R in disaster fund - SDRF atangin a pe a ni.

Hetihlai hian nimin chawhnu atanga Champhai atanga Aizawl panna kawngpui, NH-06, Chhungte khaw kiang ping chu vawiin chhun khan lirthei chi hrang hrang kal theiha thenfai a ni leh ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

GAS CONNECTION

Mizoram chakkhai laklurna kawngpui chhia in a nghawng vangin Eirawngbawlna Gas agency hrang hrang ten Gas Connection thar pek chhuah kawngah harsatna an tawk.

Vawiin khan kan corr chuan Gas Agency te a kawm kual a, gas connection thar chu la thei mah se, a bur (cylinder) a lo thlen zung zung theih loh avangin harsatna awm mek a. Chanmari a awm Biakkungi Gas Agency chuan connection thar an pe chhuak thei rih lo a, a bur a thlen that rualin connection pawh tha taka pek chhuah zui theih an inbeisei tih an sawi.

Bawngkawna awm V Neihkunga Agency chuan Gas Connection hi pe chhuak mahse an duh angin a bur an hmuh theih mai bik loh avangin connection thar nei tur chuan rei tak tak an nghah a ngai tih an sawi a, agency neitu Pu Lalzawmliana chuan, gas chu bungraw dang nen a inang lo a, a hman ruah hun nghah zel ngai a nih avangin a buaipui dan a danglam deuh niin a sawi a, connection thar diltute chu an dil hmasak dan indawtin muangchangin an pe chhuak tih sawiin, kum dangah pawh kawngchhia vangin harsatna an tawk thin tho a, kuminah erawh an tuar na zual niin a sawi.

(Byte : Pu Lalzawmliana)

Gas Agency te hian connection thar pek chhuah kawngah harsatna tawh mah se, a bur thleng hmasa apiang an pe chhuak zel a, Aizawl Municipal Corporation (AMC) chhungah chuan home delivery an kalpui mek bawh a ni.

<><><>

SILVER JUBILEE

Mamit bialtu MLA H. Lalzirliana chuan, nu ho chu ram tan mai ni loin khawtlang leh chhungkaw tana mi tangkai an ni tih a sawi.

Vawiin khan MHIP Mamit Sub Hqrs te chuan an din champha vawi 25 na Silver Jubilee Mamit Chhimveng YMA Hall-ah an hmang a, khuallian Pu H. Lalzirliana chuan in chhungah nu in mawhphurhna sang tak an chelh tih sawiin, hlawtlinna nei tur chuan an hna chu a hniam emaw a sang emaw eng hna pawh ni se zah a, hna thawh chhan an hriat a ngai a ti a, hlawhtling tur chuan eng hna pawh thawh sela tei rei peih a ngai a ni a ti bawh.

Silver Jubilee lawmna hunah hian khualzahawm atan, tunhma a Mamit Sub hqr MHIP Building sakna a hma lo lakpuitute Ex MP (Lok Sabha) Pu Vanlalawma leh Ex Minister Pu Lalruatkima te sawm an ni bawh a ni.

Kan corr sawi danin, MHIP Mamit Sub Hqrs te chuan Hmeichhia leh Naupangte him nan hma an la reng a, faina leh tuihna humhalh kawngah theihtawpin hma an la thin a, Mamit District chhunga sorkar Dept hrang hrangte hmalakna ti chak turin an theihtawp an chhuah thin a ni.

<><><>

PM MODI

Prime Minister Narendra Modia chuan India-US inkungkaihnaah President Donald Trump-an a tha zawnga thil a thlir chu a lawm thu leh a hriatthiam thu a sawi. Tunhnaia Donald Trump-an India chungchang tha taka a sawi chhangletin Pu Modia chuan India leh US chuan an inlaichinnaah hmalam hun tha tak an neih thu leh hmabak eng tak Comprehensive Global Strategic Partnership an neih thu a sawi.

Nizan khan US President Donald Trump-a chuan Washington-a chanchinbumite a kawmnaah India leh US chuan inkungkaihna danglam bik tak an neih thu sawiin an inlaichinnaah engmah hlauhthawn tur a awm lo tih a sawi a. Preisident Trump-a chuan Pu Modia chu Prime Minister tha tak anih thu leh a thian tha tak a ni chhunzawm zel ang a ti.

<><><>

GST

Union Information and Broadcasting Minister Ashwini Vaishnaw chuan mi naran middle class chhungkaw tan Prime Minister Narendra Modia chuan GST siamthat hmangin an phurrit tam tak a chhawk bakah thilpek hlu tak a pe a ti. Vawiina New Delhi-a chanchinbumite a kawmnaah Pu Vaishnaw chuan GST siamthat chuan ramchhung sum dehchhauh GDT ah cheng vaibelchhe nuai 20 bawh vel a belh dawn tih a

sawi a. Hei hian ram eibar dinhmun nasa takin a tihmasawn dawn a ni a ti.\

(I&B minister Byte)

Sawrkar laipuiin GST chhiah lak dan thar a siam hi tun thla ni 22 atanga hman tan tur a ni a. Ramchhung hmun hrang hrang atangin he chhiah lak dan thar hian lawm a hlawh hle a. Abik takin bawnghnute leh a kaihhnawiha eizawngten GST thar chu lawmawm an tih thu an sawi a. Gujarat Cooperative Milk Marketing Federation Managing Director Jayen Mehta chuan sawrkar thutlukna chu bawnghnute leh a kaihhnawiha eizawngte tan chanchin lawmawm tak anih thu a sawi a. Hetiana chhiah lak zat tihtlem hian thil lei a ti pung ang a, thil siamchhuaktute tan sumdawnna lian leh nghet zawk a siam dawn tih a sawi.

<><><>